



順菴集

十一

墓表 墓碣 哀辭 祭文 祝文

廿五

~16  
2379  
11





2379  
15-11

順菴先生文集卷之二十

祝文

祭禮告辭丁丑

竊惟祭祀之禮祠廟為重原野為輕正朝寒食端午  
秋夕上墓即東方舊俗而禮無所據今人反致隆於  
此而廢廟中之享輕重失序深乖禮意謹考禮經兼  
採國俗冬至陽生夏至陰生之日而薦于祠堂寒食  
草生秋夕物成之時而奠掃墳墓錯舉四時分薦祠  
墓稽諸天道而有象求之人事而不悖變通之初不  
可昧然行之故茲仍元朝薦獻之時敢告廢舉之由





告十代祖安東判官府君墓文

辛卯

恭惟我祖高門華譜思簡之孫翼憲之父趾美先業  
垂裕後昆亦有賢配陰德實存歷世簪纓莫非餘庥  
世代云遠裡祀未脩窳窳空山草卉蕪穢塋域莫辨  
象設徒在行路咨嗟矧爾後嗣脩補之誠閱歲未已  
衰宗殘裔事為未周今始封築感淚橫流敬奠一酌  
以告厥由尚饗

告外遠祖福川君謚莊簡權公墓文

辛卯

嗚呼公之勲業德望彪炳簡策為東人之所瞻仰則  
况在子孫之列者其所興感為如何哉鼎福之十代

祖判官府君即公之壻而歿後衣冠之藏亦在公墓  
之側其平生慈愛眷厚之情亦可知想知也今修判官  
府君墓一氣所分無間內外不勝追慕之意茲令鼎  
祿代奠一酌伏乞尊靈降監微誠謹以酒果用伸虔  
告敢告

晚安堂李公

后定

咸平書院春秋丁享祝文

清操勵身直道事

君遺風凜然百世播芬

大峯楊公

熙止

常享祝文

丙午

河嶽間氣一代偉人馨風俊節儀式矜紳

浣溪書院東溪權公

奉安文

己酉



猗歟先生天賦懿德曰忠曰孝有才有識受業儒門  
夙蒙稔嘉繼遊石田道義相磨名通桂籍若將有為  
值世昏亂下四字缺奸凶秉國勢焰薰灼江右一帶靡然  
服役獨立不懼日以老賊懍懍冰霜屹屹砥柱由是  
丹人賴免註誤逮至 改玉入踐右螭繩愆糾謬歷  
駁三司典禮之疏士林傳說刺賄之章墨相屈膝銀  
臺諫長以退為榮清名直節星斗崢嶸出處進退惟  
義之行終始典學志存蛾述湖邑佩符海縣泣玦隨  
處設教矜紳成列矧茲杜陵杖屨之鄉不倦誘掖曾  
設齋堂月課之法日將之工伊川遺訓湖門餘風遺

迹所存禮當報事合祀道川已幾十紀江城舊祠  
賜額新揭主客斯判院宇宜別亦有 朝命許令改  
建浣溪舊址允叶衆願新廟翼翼籩豆有踐肅恭將  
事多士駿奔洋洋如在况接清芬熙我文猷其永無  
垠

常享祝文

行全忠孝道適體用啓佑後學百世尊奉

咸安廣陵子安公

宅

祠宇常享祝文

庚戌

銖視軒冕樂道安貧流風遺韻啓佑後人

鳳山書院東園丁公

好善

奉安文

辛亥



猗歟東園赫葉華宗趾美先業正氣所鍾修之身心  
行于家國曰孝曰忠動為人則平生用工惟在真實  
貴不充絀窮不摧折曾在昏朝彞倫將斃扶植世教  
孰任其負抗疏直諫斥邪扶綱羣姦睚眦具僚懼恇  
雖不見省人紀復明 聖主改玉 賜教褒旌入而  
在朝義形于色出而莅外民皆尸祝矧伊沙伐昔日  
桐鄉道義鏃厲粵有愚蒼郵筒往復人口有碑錄名  
鄉案意存依歸遺風未泯其敢等視人同尚德禮合  
報祀公論攸同士林齊起睠彼鳳山實享文簡恭惟  
文簡茲土先進文章道德為世冠冕俎豆于此多士

傾慕後來諸賢東西躋祔世有先後序列有次今公  
同陞享于左位涓吉妥靈式陳明薦啓佑後人百世  
無舛

祭文

祭外舅文 丙寅

嗚呼哀哉恭惟我公稟天寶德邁俗高行壇宇坦夷  
操履堅勁言行一致表裏交正不脩邊幅自歸磨錘  
人仰其德家化其政孝友兼至本乎天性親愛孟訓  
錫類詩詠服膺勿失不媿往聖幽光潛發鄉舉名姓  
聲利若浼澹泊無競西湖之隅寔惟佳境山中野服



川老集卷二十一  
四  
婆娑游沫乾初盡上此理永靖薄夫斯敦懦者起敬  
嗟余小子早歲委婢自慙玉潤公實冰鏡如卵以翼  
不斥而屏無言之教心自戒警忠信篤敬矢心欽景  
今烏已矣萬事雲逆善從何觀業從何請小子命舛  
中嬰竒病留滯甥館自乙至丙煦濡撫摩骨肉恩位  
銘感次骨每懷耿耿自寓廣陵道里紆覓既難造謁  
又罕俾偵別多會少憂心怲怲家庭乘暇歲一來省  
春堂晝寂秋房夜靜忘形托懷期許太盛顧此賤質  
恐難究竟常瞻德容神氣脩整竊期遐籌老彭與并  
何意一疾遽爾為昔遄承訃書真夢疑瞠西望長慟

腸摧涕鯁天未悔禍穎婦不幸德門荐罹理實難評  
福以善應不差化柄燦燦珠樹裕後餘慶瞻彼稷卨  
式公所命不離先兆孝思愈炳自喪及襄病未躬騁  
慙負幽明心如溺穽今來哭拜風露淒冷撫念疇昔  
悲思填哽恭薦洞酌庶幾來響嗚呼哀哉

祭星湖先生文

癸未

嗚呼哀哉先生而至是耶剛毅篤實先生之志也正  
大光明先生之德也精深宏博先生之學也和風景  
雲其氣像也秋月冰壘其襟懷也今不可以復見將  
何所而依歸耶嗚呼哀哉語其道可以繼往而開來



推其餘足以庇民而尊主顧厄窮而無施寔天理之  
難究自先生而視之雖若太虛之浮雲在吾黨而言  
之寧欲籲天而無因嗚呼小子托名門下十有八年  
承顏雖罕手教頻煩勉以小學詩禮之書戒以韜晦  
務實之工雖勤誘掖尚未發蒙恩深義重兢惕撫躬  
逮夫東史之編摩指導無有其餘蘊疆場之錯亂而  
未定者義理之隱晦而未暢者靡不奉承其成訓至  
若僊說謬蒙屬托地負海涵義理藪宅雖以刊汰為  
教管蠡之見顧何能窺測天海之深廣也哉粧成十  
卷擬將納上書未達而承訃抱遺編而增傷嗚呼小

子無狀攝生昧方十載竒疾血壅火張杖屨之曠逾  
一紀餘若此症之小歇庶函丈之復陪何所願之未  
遂奄櫟摧而山頽悠悠天地予懷曷已嗚呼哀哉死  
生消息理歸一致厭世乘雲帝鄉可至馭瓶鶴而上  
征先生前日書有夢有餅化鶴騎而騰空  
遊覽快活云故此引用為吾黨故事在先生為  
快樂撫遺牘而號呼益增小子之痛迫嗚呼哀哉先  
生之病而不得躬自扶將先生之坳而不得與聞含  
歛雖疾使然死有餘憾素巾加經少暴微忱替兒奔  
赴悲懷曷任荒衰不文辭失倫脊尊靈有存尚其鑑  
格嗚呼哀哉尚饗



復祭星湖先生文 甲申

歲癸未十二月十七日己亥我驪興李先生易簣于星湖之正寢粵明年甲申二月二十七日己酉而葬其門人漢山安鼎福病未奔赴前一日戊申遣其子景曾謹以隻鷄之奠哭而告之曰嗚呼先生奎璧令質簪纓高門文獻之傳家學有存墳簞迭唱炳煥日星琢磨道義粵自妙齡道備體用學貫天人德養山林餘八十春箕化已邈聖學誰明道統之傳山林推盟曰惟此道原出於天不絕如緡聖授賢傳中華嫡統止于文公天眷我邦吾道其東退陶李子奮起南

服祖孔宗朱不喪軌躅庚戌揀道此理不迂白鷄何

歲元哲重降

退溪辛酉生先生亦辛酉生故云

前後一揆寔有天意

云胡無命而至於嗚呼哀哉恭惟此學寓于經傳百家騰躍辭義難見兀坐靜究索隱闡微毫釐必析纖芥不遺旁掇子史參合乃已貴乎自得依樣是愧絲理髮櫛冰釋春融隻眼所矚鬼哭神恫窮格之妙千古罕匹昧士疑烏篋書可質嗚呼哀哉既博以文反躬造約原心杪忽晰幾善惡去彼就此曾守由勇明通灑落敬義夾拱養深積厚英華外燦容停崑羽氣逸霄翰酬酢萬變動合規度表裏交正輪翼并趣



繼開之功不愧前賢世趨勢位孰信台言嗚呼哀哉  
體既立矣用無不周治平大業素所經籌酌古通今  
不泥不拘推其緒餘至治可圖世運未降東民無福  
知德者鮮卷懷屏伏道遙湖山其樂只且野老爭席  
村翁爾予褰蘅綴杜下四字憂時一念未嘗忘爾嗚呼  
哀哉餘事遊藝文成貫道內專義理間以詞藻春春  
大雅浩浩元氣肉骨并稱風神兼至歌詩樂府咸臻  
其妙允矣吾師何才之卻寔天所命曠世難覩不器  
多能事事咸造俗人窺管各稱一善誰識鴻儒本無  
可選嗚呼哀哉之才之德竟未獲施殉身以歿吾道

誠非孔歎衰周朱阨南渡聖賢踴躍古今一路太虛  
浮雲顧何損益道大難容同門痛盡嗚呼哀哉福也  
顯蒙學未知方年踰三十始拜門墻自丙至戊歲一  
趨往三歲之內四日函丈承顏雖罕誨厲諄實指示  
周行其奈魯質令胤醇叟高才令器年紀遳亞意切  
附驥協洽之年云何不淑痛深西河遂致僂攝時縻  
俗役請告來覲臨別握手揮涕戀戀小子何有過蒙  
厚眷掩淚辭退恩遇銘骨自茲以往世故多掣更未  
摠衣因以病廢阻奉几杖十有三載書蹟徒煩警咳  
莫攀日望西雲感淚或潛自念庸愚氣輕志弱人欲



易肆天理長息庶奉話言以補黥劓今其已矣心烏  
如墜嗚呼哀哉去歲初夏伏承手畢謂有深痛此是  
絕筆驚歎震剝憂心皇皇神明扶護恃彼穹蒼閱序  
彌留冀蒙天休木稼告兆大運斯適瑞日淪光祥雲  
掩彩百年依仰一朝見背斯文墜地將誰使舉後學  
失所將誰使語嗚呼哀哉前書諭夢躬駮瓶鶴尻輪  
浩蕩周遊寥廓謂甚快樂今忽承訃哲人之萎兆朕  
先告居備勤儉隱若成法手編四禮以貧為則喪庇  
奠節治命已具務存誠信絕彼夸詡紙銘楮衾不撓  
衆譏我心安焉非歆人晞嗚呼哀哉日月不居即遠

有期柳車既飾總綽又施病伏私室不能臨穴復遣  
迷豚敢告求訣炙鷄之奠雖效古人築室之誠有愧  
孔門庶延貞疾不即死滅期與元陽左右提挈音容  
求闕余將疇托執辭以寫悲填胸臆嗚呼哀哉尚饗

祭姨母文 戊子

嗚呼慟哉去歲八月先妣捐背無母何恃有從母在  
事之如母歿身仰依從母不待遽棄我歸難必者事  
易負者心痛纏心骨實難堪任嗚呼痛哉先妣病篤  
從母來視救護之道無所不至竟致不淑哀毀幾殞  
附身之物躬必誠信嗚呼痛哉小子命薄身罹奇疾



攀擗之際慮致殞絕寬譬曉諭指示生路保有今日  
莫非恩造嗚呼痛哉諸侄之中小子年長從母視之  
如有可仗小子不肖忽焉如忘非敢忘之疾憂遑遑  
嗚呼痛哉從母之德可冠閨闈天道福善此理多舛  
早寡無子八年饋粥貞操至行鬼神可質惟時尊姑  
在堂無養又有遺孤年未及壯翻然回思始理家事  
飢寒困阨事育兼至睦嫺妊恤恩義并施衆口稱頌  
咸曰無差人於私親語必及私婦人之性尤有甚焉  
惟我從母表裏坦然從母之慈和兄之孝至誠無間  
罔或以貌余以私親一未有聞平日感歎仰德深勤

嗚呼痛哉和兄窮獨且抱沈疴罹此巨創不保無他  
頃日有書但言必死從母有知胡寧忍此嗚呼痛哉  
客冬輪疾京外染傳從母愆和閱序沈綿謂此微感  
一字當有喜豈意凶音遽到苦次嗚呼痛哉疾病不  
扶殞殮不視即遠有期又違臨殯小子之病從母雖  
知小子之痛窮竟無涯推以人事鬼道或同歸侍王  
母一左一右笑語團歡如在世否小子罔知益切痛  
苦嗚呼痛哉漢水沄沄夢阡孔安載引載柩永世無  
艱隻鷄單觴代奠遙哭靈或有知鑑此衷曲嗚呼痛  
哉尚饗



祭邵南尹文 東奎文 癸巳

我 聖上即位之五十年癸巳八月初七日邵南尹先生觀化于龍山之正寢越三月甲午返窆于仁川之先塋同門後學安鼎福病未奔赴謹具香燭脯果之需令迷豚景曾代奠而哭之曰嗚呼痛哉記昔丙寅之歲鼎福始謁星湖先生先生語當世學問之士語公不休因誦和靖贊曰六經之編耳順心得如誦已言今之尹子亦古之尹子繼而醇叟曰濂溪胸襟明道氣像邵南文庶不多讓鼎福之知公實始于此翌歲拜公一覲心醉敬慕遂篤自是以後造候雖罕

書疏頻煩微而天人性命之原著而典禮史傳之繁以至象數之盤錯疆域之分合靡不講貫若夫零句碎義微文末節亦皆披剔幽隱發露無餘其所以導愚而牖蒙者三十年如一日而鼎福或以一得有所稟質即賜印可無所吝滯公之知我愛我可謂深且切矣今春一書論啓蒙圖書解義本於班志楊玄又言撰著之法蔡範之義折衷諸說會歸一統而其言纒纒千言鼎福奉讀感喜更欲稟復而因循夏秋至于八月之旬韓士疑書來而訃書在中驚號悲怛不能自定遂與迷豚設位家塾西望長慟有淚無從嗚



呼痛哉歲值龍蛇哲人萎矣知我愛我更有誰矣嗚呼嗚呼慟哭慟哭惟我星湖先生生于絕學之餘囊墻洛建私淑陶山抽六經之遺旨發前儒之未發通天之學貫古之識自有東方以來未之多見而公早歲樞衣親炙益切篤信師訓佩服不懈仁漸義磨道立德全逮夫晚歲操履愈堅雖窮餓于藜屋之下而不改其樂雖混處于波蕩之世而不易其操若方古人實無愧於孔門顏氏之子東漢篤行之士矣公窮為匹夫無名位之可言而後進之聞風從遊者不無其人若見其尚口耳而欠實踐則必諭以勉日用之

常道若見其務新義而違舊說則必戒以遵先儒之成訓公之學如布帛菽粟之不可闕可以傳百世而無弊矣先生以知造而至於高明廣大之域公以行勉而期于光輝篤實之地先生之門得公而道益明摯乎盛矣嗚呼古之君子達而行道則足以尊主庇民如其不行卷懷獨善以自樂而已行與不行實繫於世運之推攸而固無與於我則我之所樂不以此而輕重抑何憾焉嗚呼先生之道公得其宗而家學淵源至景協而盛矣如鼎福者資性鄙闇加以癡廢唯願左右其間樂觀成法而公今已矣誓與景協及



一二後輩保守先生之遺文益勵桑榆之晚節庶於此生修身補過以無負我先生及公期許之至意而病拘其志事與心違尤悔山積至道莫究惟公憐而監之泉臺會合若如人世函丈之間告以此意冀有以陰輔之也緘辭替告悲慟愈切想公如在鑑此微衷

祭淑人昌寧成氏文

乙未

今日是乙未三月戊申朔也夫鼎福謹告于淑人昌寧成氏之靈而哭之曰淑人之亡今已三月矣今已三月而猶不知其為死也自外而入有若聲音之相

聞饑而有求食之意病而有求安之念家務之商量者忽若有相議之心輒起旋止四十七年同甘苦共悲歡如鼓瑟琴之義至此已矣嗚呼痛哉今淑人定死矣淑人昔與我共事吾親恒以甘旨之不克為憂遽纏風樹之痛未遂善養之願淑人今歸矣下從父母舅姑于泉下其能夕乎父母朝于舅姑承歡如平日而團聚之樂與人世無間耶若然則淑人之死不可謂不幸而顧此遲遲不死不與淑人同此樂者果可悲矣嗚呼痛哉今因哀悼之心追念疇昔之事淑人孝謹之行根于天性入門以後未有違德舅姑愛



之室家宜之敬恭承奉不敢暫懈拂逆之色違越之事未嘗一施于舅姑之前自少至老如一日若其有疾則食物之外至於藥餌調煎之類躬自行之不以委人我家貧甚人口衆多而祭祀之繁重賓客之浩煩歲入不能供其半淑人殫竭心力左右拮据要以盡吾誠而止焉及其疾病危困之時若當享祀之辰雖不能躬執籩簋而達宵不寐照察物品其非向先之誠有過人者能如是乎淑人性度柔順謙下為事惟以中饋自任詩所謂無非無儀惟酒食是議者其惟淑人乎我性勁急雖在父母之前或欠愉婉之色

則淑人必戒之曰吾聞古之孝子有柔色婉容未聞以勁直之氣事親苟不如是何貴乎學我之胎疾雖未能勇革心焉欽服蓋已深矣但余踈迂少曲折其於淑人未嘗以一言相假淑人每以不知已為言然我豈不知而淑人之以不知為尤者亦豈實語哉噫余孱質自少善病晚嬰奇疾疾症之動頃刻難保淑人憂勞焦煎當食不食當寢不寢衣不暇解足不暇履不以老而少懈使我保有今日淑人之力也此雖家人之常事而淑人之殫誠盡意非人所及也今我獨存淑人歸矣此恩其可忘哉所可恨者緣吾窮貧



使淑人不得一日安其身糟糠不厭冬無絮夏無葛  
疊草而席折裙而被人所不堪而我或慰之則對之  
以克家之不及人淑人之勤儉不懈至于屬纊之日  
而尚猶眷眷則豈克家之不及人而然耶淑人謙下  
之德於此尤可見矣六七年來淑人病情信有源委  
泄痢之候隔滯之症實非老境所宜究厥所崇由  
於居窮飢困而終不能用以大劑補其真元荏苒年  
歲至于去年病勢添重以至于斯此豈非終天之恨  
哉去冬以後我知病勢之無可為也欲治送終之具  
而聞有淑人手線繭紬將欲用之淑人力止之蓋其

意為我他日地也雖在疾病之中向我之意若是至  
焉事雖瑣細不覺心痛壬辰以後我再被 召赴淑  
人戒之曰世路多巖直道難容第念丈夫天性踈濶  
信人太過恐非處末世之道也吾家儒素不知軒冕  
之貴不如服田力穡以救朝晡之資斯已可矣今則  
致養無所仕宦何為此豈俗間庸婦所能道哉嗚呼  
痛哉淳謹之質端潔之操謙下之德今不得復覩矣  
我平生不輕許人豈於淑人為溢美之辭嗚呼痛哉  
淑人今已蟬蛻于血肉軀殼之中浩蕩于太虛二氣  
之間聞我此言其或矜而憐之耶抑或笑其不知命



耶是未可知也一子笄了一女未奔此我心之所痛  
淑人亦或傷心否乎今因朔奠呼寫伸告靈若有知  
鑑此衷曲嗚呼痛哉尚饗

祭鄭君顯 赫東文丙申

嗚呼君顯遽棄我而死耶棄我尚可尊公臨年而扶  
將無人慈服未闋而饋奠靡託是果忍而死耶君常  
以甘旨之不克為憂而務以養志為孝今貽大憾于  
尊公而瘞孤之日號慟於親側是果養志之道耶顏  
子聖而死先於父豈不知養志之道乎稟賦有厚薄  
壽夭有遲速大化所驅難容人力噫嘻主死生者天

而天道福善仁者必壽何自古良善多窮窮者多天  
其理洵次實難推測人生百年終須一死其死其生  
不足悲喜然而以人事而言則死之可悲有數說焉  
親老而死可悲也有志未就而死可悲也先業未振  
而死可悲也君具此數者而君遽死死實君之所悲  
而生者之心尤不勝其悲也嗚呼君故人之子余居  
此鄉四十一年而君年三十七則自君始生至孩笑  
學語學字余皆知之加膝撫頂心常愛重深喜休翁  
之祀有托自余病廢不見君累歲歲丙子君冠而來  
見見其氣貌言動又非幼稚時比也遂語以古人為



已之學君樂聞之不已自是以後二十餘年庭前之  
苔為君踏破無暇生矣今為已矣修潔之行端飭之  
操不怠之學將何以復見於斯世耶嗚呼慟哉自君  
死後我益無倚讀書有疑誰與相問著述盈籠誰與  
相劇花發春山誰與同賞夜靜秋堂誰與共話水邊  
林下看雲步月皆成陳跡忍使我不死抱此遺恨而  
無所於發耶嗚呼痛哉君素有源委之疾今歲春夏  
再度來見纍然衰服之中形氣凋悴深以為憂但其  
飲啗不異神精無損恃以無恙豈意客症闖發奄忽  
至此耶病未躬診歿未憑屍惟與龍卿相持一哭而

已矣君之歿已浹月而旬竟未趨哭且唁尊公西河  
之慟余之竒疾君所知也君視我我視君無間於骨  
肉而當死生求訣之際終不能一聲大哭以纏纏胸  
之悲懷未死之前此恨何已然而余亦餘景不遠幾  
何而不與君相從也但未知死者之會合亦如人世  
否也是可悲也代奠一酌庶幾歆格嗚呼慟哉

祭亡子文 丁酉

維歲次丁酉三月二十七日癸巳故成均生員安景  
曾觀化于木川縣衙其父之任所將以五月初七日  
辛未返鞞于廣州德谷之先塋前一日庚午其父奠



而哭之曰至情無間何用文為父子之親一氣相仍  
雖幽明路殊生死形異旨意所存自相感通是以父  
祭子子祭父之文古不多見蓋其至情所在不可以  
言語文字而為之也然而今汝之死歸我未隨喪而  
使汝獨歸則烏可無一言乎嗚呼痛哉惟汝文學之  
懿孝順之性非惟其父許之鄉黨諸友之所稱自汝  
孩提以後未嘗有子弟之過兼以端飭之行謙謹之  
操而韜晦隱約無一毫加人之意以有為無以實為  
虛此余之所貴而人所不知者也語其姿稟則近乎  
仁語其性情則近乎靜仁靜之必壽天理之固然而

今汝至此天寶難堪莫非汝父業障之所關耶嗚呼  
痛哉奈何奈何堪輿之說雖不可信先山更無餘穴  
適余來守外邑而汝又死焉故初將卜兆於此土歆  
求眠牛之地而首丘之懷古今同然使汝歸葬魂兮  
歸去亦必有喜余有官守而兼以疾病不得與汝同  
歸哭奠一觴此慟曷已餘懷千萬不待言論尚饗

社稷祈雨祭文

丁酉

某猥以不才濫守茲土夙宵兢惕罔知攸濟而又值  
亢旱二麥既損移秧無期上坪下坪幾盡龜坼小民  
喁喁呼號道路大抵雨暘之不若實由於政令之乖



當此莫非某為宰無狀致此大戾也竊惟社稷之神  
主土主穀惟此民人非土何依非穀何生人神無間  
自相保佑天地之大德曰生惟以生物為心邑社邑  
稷所掌雖不過一境之內而屢萬民命之仰戴而生  
者惟社稷是賴假使年穀不登則民何以生而享神  
之節將何以為之哉伏乞神明體上天至仁之心憇  
生民無辜之情速賜甘霈反歎為豐至若守宰之有  
罪則自當論罰無關於百姓敢將牲幣仰伸微忱

象王山 丁酉

曰惟黑城鎮茲百里各標地誌夙著靈異興雲作雨

潤物澤民亘古亘今罔愆霈恩間有愷闕或由人事  
雨暘不時職司攸致方茲農月四野龜坼哀我萬民  
瞻天雀息溝澮乾涸種不入土二麥既枯秋穀亦蠱  
昨告社稷社稷不應非神不靈各有所能雲雨之權  
專藉山靈上訴玄宰俯矜民生連其化柄惠此元元  
咎實在我民何辜烏霈然三尺澤及四境豈但吾民  
邦國之慶仰之彌高盡禮盡誠

鵲城山 丁酉

竊惟茲山出自慰禮自夫餘氏以後名揭地乘著在  
祀典實靈秀之會而民人之所瞻也曰暘曰雨操化



育之柄歷千百年而至于今矣近以旱魃為災麥既  
枯而不實稻又不得以種民生嗷嗷籲告無所主  
上悶念責躬有教方伯申命修舉舊例守土之臣駿  
奔承命肅將牲幣鎮日呼訴于社稷畧施一犁次  
及黑城密雲不雨奉天命而主化權者神也天以生  
物為心豈欲使斯民顛連於溝壑而神亦豈有違天  
命而私予奪於其間也哉災異之來必有感召之因  
良由某才淺德薄奉職無狀無以媚上下之神祇無  
辜之民并受其禍豈不冤哉伏乞明神諒此至情政  
令之不便致此災盭則罪止于某之一身速賜甘露

惠此元元某不揣鄙謬輒具菲薄遣人致虔于山門  
之下東望叩頭無任祈懇迫切之至謹告

驚巖山 丁酉

天地開闢山岳列峙各主境土為民之紀吐納雲雨  
叅贊化育苟失神功誰任其責近有天譴旱魃為虐  
川澤渴涸田野赤坼農時漸晚播種愆期哀我民斯  
失天何依悶此嗷嗷跼蹐未寧籲天無階禱于社庭  
一犁甘澤縱蒙神惠揆此滂沛豈曰有裕再整牲幣  
奔走羣望次及象王次及鵲城雨意杳然杲杲如前  
時政失宜神豈怒然惟此驚巖亦著靈異敢伸虔告



冀蒙神惠咨我山靈特念所付上訴天門下鑑后土  
撫駕雷公指揮電母夬賜霖雨膏澤旁流溝塍滔滔  
百穀由由艱食無憂是誰之德罄竭微衷庶幾來格

重九峯 丁酉

伏以贊天地之化而參為三才者人也操生成之柄  
而亭毒萬物者神也人道主陽而神道主陰自相依  
保奉承天命惟以仁民愛物為心今茲之旱節逾夏  
至兩澤不降以民言之民將飢餓而盡劉矣以物言  
之物將焦枯而盡銷矣無民無物神將何依而奉承  
天命之意果安在哉竊惟重九峯以巖巒之體勢言

之雖不及於象鵠鷲三山而居一境之中為都會之  
地包有閭閻為邑中人民之所瞻仰民之所歸神亦  
依焉此茲峯之所以入于祀典而為邑民崇奉之地  
也民有所願神必從之今以魃災自今月十五日以  
後告于社稷社稷無靈告于三山三山不應由此言  
之神人相與之義無可言矣若以時政之不善而言  
之則罪在守宰以守宰之不肖而使無辜之生民罹  
此禍毒實失賞罰之權而為生民者豈不冤乎伏乞  
山靈鑑此至懇速賜甘霈使槁枯之苗得蘓使赤圻  
之地潤滑無論上平下平皆得移秧高田低田畢盡



川卷集 卷二十一  
穰熟則可謂得神人相與之意而奉承天命之義至矣盡矣謹具菲薄虔告山上惟神有靈俯矚微忱

祭亡子小祥文 戊戌

維歲戊戌三月辛酉朔二十七日丁亥即亡子成均生員景魯之小祥忌日也其父時任木川縣監病伏官衙不能奔哭以臆晡單酌之奠使人告于靈筵之前曰嗚呼痛哉以子哭父理之常也其哭也宜以父哭子理之變也其不哭也亦宜前年是日汝死而余一哭五月七日汝靸返故山余又一哭而送之自後至今不能一哭則謂之不哭可也嗚呼天鍾至情豈

容如是不哭之哭有甚於哭若能一哭而洩此哀則雖一聲二聲至于千聲萬聲氣竭而哭之不難而不足以洩此哀徒有時隱痛而吁嘆而已若能一泣而洩此哀則雖一行二行至于千行萬行淚盡而繼血不憚而不足以洩此哀徒有時撫胸而掩淚而已嗚呼任情傷悼無益於汝而有損於我則其將割哀塞悲木石為心而忘之為貴汝若有知亦必以為慰矣嗚呼汝妻吾婦汝子吾孫汝既棄而歸矣吾將扶護而教誨之使汝之魂無所憂憾是吾在世一日之責也嗚呼雖欲忘之而終不可忘者每想汝孝順之行



川者集卷二十一  
端勅之操謙謹之德粹美之姿雖欲復見而不可得  
是豈可忘者乎言有盡而意無窮掩泣搆文替哭以  
告靈庶幾饗諒哉此日之慟

祭朽淺黃公

宗海墓文 戊戌

鼎福幼時於家塾書厨讀先生之集知先生之學慕  
嚮之夙矣匪意濫膺 朝命來蒞茲土此實先生杖  
屨之鄉而衣冠之藏亦在于此宜即展拜以慰瞻仰  
之誠而疾憂喪威之餘精力摧弊荏苒玩揭歲幾再  
周向善誠怠愆尤實多先生受業於寒岡鄭先生鄭  
先生受業於退陶李子眉叟許先生撰先生墓碣言

之詳矣淵源之來既如彼學術之正又如此宜後學  
之尊慕愈久不替也禮詩勅身門規睦族洞約範俗  
先生明體適用之學修己治人之道於斯備矣於乎  
盛哉噫山川依舊人士猶昔而恨無如先生者出而  
繼修先生之業故士趨失正人心日訛某身為邑宰  
宜有轉移之權而德薄才劣年老志弊徒切感古傷  
今之歎而已嗚呼奈何呈告得逋即當決歸不勝悵  
惘茲暴誠懇伏惟尊靈庶幾鑑格

祭權尸庵

巖文 庚子

嗚呼休休寬仁之德磊磊竒偉之器孜孜孝友之行



燁燁文華之懿求之古人而難得兄獨有此衆美雖以余癯廢之質幸得良友恃以為倚誰謂天不佑善而今遽至此耶嗚呼痛哉與兄結交粵在丙子至于今二十五年之間歲必屢枉問我生死念我之危厲憐我之羸僊憂我恤我無所不至銘感厚情居常與喟從今以後誰復省視當其相逢之際未嘗發一俗例語必揚確令古出入經史晷竟夜分而未已或撫膝而詠楚澤遠遊之賦抵掌而誦菜園髑髏之章曰人之至樂果在於乘彼白雲至于帝鄉何必顧戀於血肉之殼紛爭於嗜慾之場耶噫是兄戲言也然而

亦足使清士咨嗟懶夫激昂昏愚如我者思欲振衣千仞岡洗滌濊濁之肚腸彼甘豢世味局促而蹙蹙者何足以概量乎哉嗚呼生寄死歸兄知其理存順歿寧兄識其真兄今返元氣而徜徉與太素而為鄰回視下界一微塵內恩怨爭致而瞥不畏死者兄必惻然而痛呻之矣然則保天衷而全歸俯仰少忤者無如兄矣兄之死實可賀而不足嘖也况乎恩周惠洽哀動鄉鄰五子傳家趾美行仁者耶是以余不敢以世俗拘牽悲疚之辭仰俛兄之靈神但死者之有知無知不可知而生者有知則未死之前踴躍孤蹤



無復有知我者此私心之愴辛者也嗚呼白首青山  
相見無期有誰相喚胡遽其歸展閱舊篋執書徒悲  
一酌代奠萬古長辭未定之懷兄死尚疑聲氣之感  
幽明同歧英靈不昧庶其監茲嗚呼痛哉尚饗

祭南甥 咏文 丙午

維歲丙午十月某日干支順菴老人使舍弟借奠酒  
果哭告于孫甥南君士涵之靈曰嗚呼痛哉幽顯雖  
殊君應知我我是順菴老人也君生時必曰順菴順  
菴則君之知我無疑矣君之病且死且葬矣我豈無  
一言相訣而老人之病廢久矣子孫之替行者亦以

冗故之未脫尚未得奔哭則是豈人情也哉余之舍  
弟亦君之無異視我者也聞君之歿必欲一哭而不  
得今始決意進去是猶余往也嗚呼痛哉君之棄此  
世而去何其速也君之老親在焉妻子在焉則有誰  
相招何歸之速耶以君立志之剛果稟性之慈諒其  
壽必不止此而至於三十三而終焉則世運所關天  
理難諶抑或人事之有所未盡將攝之失宜藥餌之  
失當而至於斯耶嗚呼痛哉君之幽堂之文余所撰  
也略舒君言行且道我悲苦之辭君其知耶否耶君  
之聘君則余之獨子也余失獨子今已十年矣君亦



春府丈之獨子而又貽此逆理之憾則踽踽此世窮  
獨無依之狀余與春府丈一也君何忍為此不忍為  
之事也思之腸裂言之哽塞嗚呼痛哉庶幾歆格

祭聾窩文 丁未

我聾窩公之亡漢山安鼎福力疾奔赴于大歛之日  
操數行文奠一杯酒撫屍哭三聲而歸然猶疑其不  
亡或意杖屨之臨顧又意書尺之問訊而寤今數月  
無所得今聞永窆于胎峯石秀巖之先塋即丁未歲  
之三月三日辛未也公今定死矣茲以前一日庚午  
使家徑景淵以菲薄之具替奠于柩前而告訣曰余

自卍角慣聞公名思歆一見而不得昔在丁巳始識  
公面而相見歡如也後八年甲子公來卜于近鄰公  
來我往履舄交錯未嘗有旬日之間者十年癸酉公  
移湖右源源之樂雖不如前而有時書䟽翩翩如得  
面晤或於行旆北至留款累日雖間濶之或久亦合  
并之可喜庚子公搬歸楸下為畢命之計於是而二  
老相依百年為期公健無疾我病癯廢公每念我謂  
我先歸理有難謀公先于我是何事耶是何事耶公  
今死矣則可知死之為樂矣有知無知雖不可知而  
冥冥漠漠不知苦海萬端生受誰謂生之樂而死之



苦乎公與我俱迫八旬人世之壽斯已足矣所可慟  
念而難舍者自公歸後心神惘惘形迹踽踽文酒之  
席誰與諧笑禮節之疑誰與談討經世之畧誰與擘  
畫憂天恤緯誰與感慨春山花散秋堂夜靜投筇剔  
燈誰與賞詠已矣已矣嗚呼痛哉所託文字余不敢  
忘胤哀輦又請公誌于余而疾病連仍精神迷昧不  
能發揚亡友之懿行是懼耳嗚呼痛哉靈必有知庶  
鑑微誠尚饗

祭權叔謙

益彥文丁未

嗚呼痛哉君何以棄我而先歸耶以其年則君少我

二十八歲以其質則君強健無疾而我孱質癯廢如  
之何使少而強健無疾者先死而老而癯疾朝夕求  
死之人反哭君耶嗚呼痛哉五月初六日君舅氏景  
新來自君所謂言君數日後當來故逐日企佇望眼  
幾穿因而長霖浹月便使阻絕六月初二日夕貴奚  
來傳病報翌朝訃書繼至西望長號涕淚迸流慘痛  
之懷無異於骨肉之情嗚呼嗚呼此何事此何事耶  
嗚呼痛哉人之相知貴在知心古人忘年之交實由  
於知心今君死矣烏得無一言而哭之哉余素不文  
凡於知舊之喪不敢以文哭之者果是不文而然也



然而歲後輦窩之喪不得不以文哭之今於君之喪  
若不以文哭之則誰知君與我忘年情誼之深篤耶  
文不文不須論也嗚呼痛哉大相國之深仁厚德宜  
能享有百世而今其血胤惟君父子君已遽歸稚子  
存焉誰將補護誰將教導乎古謂天難諶斯果如是  
耶嗚呼痛哉余實不似老而不死病而不死久住此  
世過咎日積邇來學術岐貳見忤於後進者多矣君  
必隨事掩護恐或有害於余身此實余之自取而君  
之愛我許我之心非深且篤豈如是哉余常以君比  
之海上逐臭之人而從今以後無復有知我者矣無

復有護我之短而恕我之昏謬者矣踽踽老蹤將何  
倚毗無異無筇之瞽失路之馬俵俵烏靡所底止奈  
何奈何嗚呼痛哉尤可痛者秀偉之容儒雅之質仁  
厚之性貞慎之操環顧斯世於何而復見如君者乎  
君之死月已闋矣而在心之慟終不能已既不能撫  
柩一哭又不能臨穴一訣悠悠此恨必將死而後已  
余亦朝暮間人非久當相從於泉下未知能如人世  
之樂否嗚呼痛哉凡人弔哭之文必以目前情境言  
之今君鶴髮在堂稚子未成家事無託此實人情神  
理之所不可忘者而今於哭君之文不敢舉論者蓋



以人生命分壽夭由天而不容人為茲不煩告以撓君心而有晚漁亭父子存焉以是恃而為慰耳嗚呼痛哉庶幾降鑑諒此哀衷尚饗

祭安佐郎正進

景漸文 己酉

己酉五月十七日癸酉故佐郎聚辨齋安君正進以疾終于密城之星巖正寢宗人不衰翁某遠在千里加以癯廢不能匍匐而往哭則聞其喪而哭于寢門之外而已是年十二月家弟鼎祿以事踰嶺使之哭告于靈几之前曰嗚呼痛哉知我者君而君至於斯耶愛我者君而君至於斯耶學歲辛酉君發解而來

寓我家年纔弱冠觀其溫雅豈弟之姿謙恭謹勅之容可謂金玉其人而兼之以文辭通達志操耿潔人之見之者亦莫不愛之好之則我之愛君固也而君之愛我亦不下於我之愛君則君何所見而愛我之甚也自茲以往君之來遊京洛間者數矣觀其年愈富而工愈篤工愈篤而學愈就昔之通達者益之以純熟前之耿潔者加之以堅確儼然有成德氣像而前後三十年間踰嶺而南則以其家為家踰嶺而北則以我家為家情之密也誼之篤也而其於聲氣臭味之間言笑咳唾之際亦自有泐然相合犁然相契



者則於是乎知君者莫如我也知我者莫如君也及乎辛卯釋褐之後潦倒微官旅進旅退君之足跡漸稀於漢水靈山之間則自我不見今且十六年于茲矣然而十六年之間有便則有書有書則有問滿幅情意藹然可掬而其於經禮之問往復之說盈箱溢篋矣豈意今春赫蹄便作千古之訣而世間更無知我愛我之人矣嗚呼痛哉自君之歿士林失望吾道無託在心之痛不但為宗親之私情而已君生既知我則死亦知我心矣嗚呼痛哉我亦在世亦復幾日而從君於地下乎便忙意迫情溢辭縮不昧者靈庶

幾歆格嗚呼痛哉

哀詞

黃得甫哀詞 己卯

星湖先生講道於絕學之餘而窮而在下無勢位聲光之薰炙人者故非志篤墳典而心安貧賤者鮮有歸焉及門之士數人而黃君得甫其一也余聞而願交之不得辛未夏竊祿于京師有人來見麻衣草屨蓬累其形下揖登坐接其色笑溫然已知為清修吉士也及道姓名而果得甫其人也忘形虛懷一言相契幾乎無我矣京鄉阻絕雖未源源同心之好未相



川香集卷二十一  
忘也壬申春余移守靖園得甫謝履之行自永平之金水亭至漢水之陽登狎鷗尋奉恩而歷訪烏留一宿而歸心期之許談討之樂又加深矣甲戌夏余入臺監得甫以事在京其舍館至近也昕夕來訪時余以親憂燭灼不能談經論文如平日而其相須相倚之情轉密矣無何余丁憂病嘔血欲死不可須臾生得甫唁慰之其容慘怛可掬及扶觀歸葬得甫徒步來臨非徒心許不憚勤勞匍匐之義又如是矣自是余守廬窮山得甫糊口不暇數年聲聞相絕丙子四月余坐堊室有曳衰而至者即得甫也驚怛之餘

問知遭其考同知公憂而漠然不能聞也其來也以年凶國家移南漢穀于列邑得甫居南陽為受糶米且欲見我也其窮且困可知也已是夜留話衰經相對悲泣論懷而講說平日之疑義自經書性理之與禮文度數之儀至若歷代之興廢晷度交會之術靡不爬櫛而舉之雖在憂服之中亦足以自慰也臨別謂以秋當躬糴後會有期至秋無所聞翌年春尹丈有書傳得甫之訃先生又有書云得甫前年失第二子今與長子及內子俱亡雖云遘癘要是飢病安貧士常古今稱顏子然所安者簞食吾輩饘粥不繼



至於殍死則不已難乎噫命矣嗚呼哀哉執書涕泣  
不知所云五年病廢人理都絕得甫平日常常臨余  
而余一未造衡門余遭憂得甫臨問而得甫之憂余  
未能問余疾病得甫為之憂而得甫之歿余不能奔  
哭得甫不負余而余之負得甫多矣嗚呼已矣奈何  
奈何得甫孝於親信於師友見重於鄉黨而姿質之  
美文學之博士生斯世如斯足矣窮為匹士而有藐  
大人之志貧不黔垓而有塵富貴之心可謂豪傑之  
士其得於天而不得於人者先生所謂命也吾復何  
恨得甫亦將無所恨於地下矣嗚呼哀哉終祥幾至

几筵將撤而寢門之痛無地可洩瞻彼佳城宿草蕪  
沒若不死於此疾則是將為他日紆哀之所乎掩泣  
搆詞歸之其家詞曰

人物之生皆稟於天以氣質厚薄之不同有受命窮  
通之相懸與齒去角其理宜然是以聖賢多阨窮而  
不遇蘭蕙易摧折於風霜豈天之好惡與人殊耶是  
氣機窒而難通也知此義者其於死生榮辱之分不  
足以撓吾中矣余既知之子必知之如其知之何恨  
何悲所可悲者逆旅人世一去難復邂逅朋交一失  
難得子立乾坤晤言無從嗚呼哀哉曷日而忘



順菴先生文集卷之二十

順菴先生文集卷之二十一

墓碣

通政大夫承政院左副承旨兼 經筵叅贊官

春秋館修撰官今是堂李公墓碣銘 並序 癸巳

密城李君植簡寄款余曰先祖今是堂事蹟散佚不見于世懼其久而愈泯也搜輯斷爛圖為不朽願子之文之也余惟銘述人先德非人人可能余何人敢當作者之任也然李君與余無素特以聲氣之感而有求焉余終不可以不文辭按公諱光軫字汝任驪州人起於始祖諱仁德八世至諱行號騎牛子謚文



順者集卷二十一  
節公以文章節行著於世於公為六代祖曾祖諱曾  
碩為讓寧大君外孫官中和郡守祖諱師弼考諱遠  
進士妣南陽洪氏奉常副正潤德之女以正德癸酉  
生公自公之王考始居密陽公少力學工文辭中嘉  
靖庚子生員丙午別試文科戊申選槐院由權知副  
正字序遷著作己酉薦入翰院由檢閱至奉教又  
除承政院注書俄陞成均館典籍兼南學教授累遷  
為戶工禮兵曹佐郎辛亥為親丐外出宰順天壬子  
移監興陽尋改泗川在縣薦李龜巖植孝行甲寅歲  
飢公盡心荒政以治理聞 上褒賞之戊午移監昌

寧辛酉復入為兵曹佐 即尋陞正 卽歷踐司諫院獻  
納司憲府持平掌令校書館校理軍資監副正至正  
司僕軍器二寺正乙丑正月陞通政 除承政院同  
副承旨歷右副左副四月出為潭陽府使此其歷官  
大略也丙寅八月二十五日卒葬于推火山舍人洞  
壬坐原從先兆也公早孤事大夫人以孝聞性嚴毅  
果斷莅官侃侃有能聲官情素泊雅志林泉嘗構堂  
所居龍湖之上扁以今是蓋取淵明賦歸之義也配  
淑夫人密陽朴氏叅奉英美之女後公卒祔公墓右  
生二男二女男長慶弘叅奉號謹齋次慶承進士出



系公伯光輅後女長適正即朴惺號大菴次適郭求  
吉側室子慶浚慶弘無子取慶承次子壘為后女三  
人適主簿辛膺縣監權應生士人崔敬止慶承二子  
壘壘內外子孫總若干人今是堂因亂荒廢公五代  
孫之運就舊址重建顏舊號於李君為王考云銘曰  
文節之後曰有偉人夙闡科第文彩彪彬歷駁華選  
翱翔郡邑身縻簪紱志耽泉石柏谷一隅山川瓌竒  
堂扁今是義取陶辭微言懿行蕩佚兵燹後孫克肖  
堂構重建裒遺聞潛德復揚清風百代龍湖洋洋  
鑱石揭表垂示來億賢人之藏過者斯式

務功郎

璿源殿叅奉謹齋李公墓碣記

癸巳

公諱慶弘字伯藐號謹齋係出驪興文節公諱行之  
七世孫今是堂左副承旨諱光軫之子妣淑夫人密  
陽朴氏叅奉英美之女正德庚子生公公幼習庭訓  
長益淬礪所與遊皆鄉邦名德中隆慶庚午生負試  
萬曆辛卯春以孝行薦除璿源殿叅奉翌年有  
漆齒之亂公自北關奔歸奉淑夫人避寇于所居密  
陽府東之石洞公住山間奉親盡菽水養未幾而公  
卒即某年二月初十日也亂棘權厝不克備物庚戌  
正月公諸婿及繼胤敦匠改斂遷窆于推火先塋壬



坐原兵火之餘公之言行無所考信而幸有整漢孫公起陽輓祭文其言曰弊鄉無祿失著龜後學從何質所疑又曰家傳詩禮行著孝友幸奉杖屨義實師生又五休安公玠述其族父玉川先生餘慶狀有曰公與鄭寒岡述金東岡宇顥郭存齋趙李謹齋慶弘朴大菴惺為道義交更相往來切磋琢磨此足以補家乘之闕也五休嘗質業于整漢整漢又受學于公二公之學問節行為鄉里所推服而二公之言如是則公之事蹟雖沒沒無傳亦何傷哉公前配固城李氏忠順衛都之女生三女墓祔公墓左后配昌原黃

氏無石墓在公塋東二十步女長適主簿辛替次適縣監權應生次適士人崔敬止側室女適萬戶朴仁立取弟進士公次子壻為嗣通德郎生一男一女男昌胤宣教郎女適士人鄭埜昌胤子萬種萬種子之運之運四子洙涉緒沉洙子植云

英陵叅奉林泉襄公墓碣銘

癸巳

昔我 明陵辛巳嶺南紳士建道泉祠于鶯城以祀鄉先生林泉襄公其一也鼎福生晚未之聞也今年癸巳始識公後孫相度按其先故盆城世家也公諱鶴字太冲自鼻祖盆城君元龍歷六世至諱縉入本



朝官司憲府監察監察生諱仲厚進士進士生諱世緝副司直即公曾祖考三世也妣鷺城辛氏縣監永理女公以弘治戊午生于靈山縣之鄉校洞天姿溫仁事親至孝及遭內外艱歎粥守廬晨夕哭省雨雪豺虎不少避終三年如一日喪祭諸節一遵文公定禮嘉靖乙未舉遺逸除英陵叅奉不赴公志尚高遠自早歲絕意進取專心性理闢書室于竹林中藏修涵養若將老焉自號林泉周慎齋世鵬嘗雪中寄詩云君看武陵雪遙連鷺山雲又訪公題詩壁上云一訪癯仙竹院中留詩半日坐清風南冥曹

先生亦邀公於山海亭連床咬菜談討義理其為當時名德之所敬重如是隆慶己巳十二月初九日卒壽七十二公同閤友李公中學問士也師事金大成湜己卯禍作大成來投李公李公舍匿之公亦與知及事發李公被逮鞠訊竟不告與公同事狀故公得免由是公義李公甚臨終囑子弟曰吾與而強有泉壤相須之義葬必相傍而強李公字也時李公已歿葬于縣東青巖山至是葬公與之同壠後以宅兆不利遷厝于縣西廣池山卯坐原公娶一善金氏忠順衛光晰女墓在青巖山某坐原生三男一女男長湜



川卷二十一  
次漢有文行 贈吏曹叅判次漢女適朴斯立湜漢  
俱無子漢有二男大維大綸大維官承旨號慕亭以  
文章筆法名世二子弘祐說書弘祿府使各有二子  
曰敬徽敬微敬善敬宸大綸二子弘祉弘禮俱以孝  
友稱弘祉子命胤亦以孝行 贈工曹佐郎弘禮三  
子命契命益命說今其世遠者至七世八世公之嘉  
言懿行世久湮沒而權蒼雪斗經撰春秋享祀祝曰  
孝著家庭趣高山林學問功專師友資深人謂之實  
錄是皆可傳者也銘曰  
傳有之云士尚志又曰遯世不見知而不悔若喪公

者其類是矣名存士林慶流後昆歆知公德請徵斯  
文

通政大夫守全州府尹 贈嘉善大夫吏曹叅

判權公墓碣銘

並序  
甲午

甲午春余寓城西權生一彥踵門而請曰先祖府尹  
公之歿今百八十有三年矣有勳勞於國而人未有  
知尚闕麗牲之石恐其久而湮沒也裒粹文字於斷  
爛之餘願子之文之也余惟不朽人非人人可能辭  
而請愈懇謹受其狀而讀之蓋取家牒及公所居鑄  
字洞誌湖南紳士呈文而編成者也按公諱懋字思



遠其先永嘉人高麗太師幸之後子孫昌大代有偉人至諱溥號菊齋封永嘉府院君以儒行德業名於公為九世祖曾祖諱旭副正 贈左承旨祖諱振叅奉 贈叅判考諱常舉孝行以耆耋官同中樞以子愔恢貴 贈領議政東興府院君妣 贈貞敬夫人安宓羅氏禦侮將軍云傑之女生五男公其長也公以嘉靖乙未生中甲子司馬登隆慶丁卯文科壯元以名家賢胄歷歛華選官至承政院左副承旨嘗以書狀赴京飭譯輩申禁令將歸搜索中贓悉火之華人聚觀嘖舌曰真御史也其居臺憲守正不阿宰外

邑惠化流行光廣二州民立石頌功而廣民至以公名名橋以識之也萬曆壬辰夏倭酋秀吉舉國入寇朝野震駭 宣廟簡文武才能臣南下為守禦計以公為全州府尹時昇平日久猝聞賊至人視兩南為死地公聞 命馳赴民已烏獸竄州城空矣公招集散民激以忠義諭死守之意眾皆感泣聽從於是浚濠脩堞設火器備糗糧又選精銳伏麒麟皇華二峯以待賊布置既畢而公病革召諸將吏屬之曰毋以我死而少忽克保此城使死者瞑目因長吁而逝即七月二日也諸將吏遵公遺戒未幾賊至見守備甚



嚴遁去城之得全公之力也麾下李廷鸞以為已功  
被寵擢而公無聞焉後南人頌冤道臣狀聞特

贈吏曹叅判此其大畧也噫公之言行宦業雖無  
所傳昔太史公記荆軻事猶採夏無且一言况此洞  
誌民狀出於當時記實之文者哉公卒時年四十八  
葬于通津縣東明月山某坐原配贈貞夫人南陽  
洪氏都事世弼之女卒後公祔公墓左生三男三女  
男汝中贈司憲府掌令繼中蔭宣傳可中業文婿  
縣監黃祐商進士吳商吉生負李國亮庶男泰中汝  
中有二女無男以從弟好中子大慶為后壻叅奉梁

泓蔡純庶男大春繼中出為人后可中一男一女男  
大一婿李灌黃祐商六男四女生員以昌以章以榮  
以翼以厚贈戶叅以煥婿閔鏞奉湓金終善成時  
夏吳商吉二男二女益輝晉輝婿生負權以一直長  
鄭馨遠李國亮無后銘曰

德有始潛而終顯者功有暫屈而永伸者潛顯屈伸  
各有時焉顧於公何憾雲孫克肖墓石新鑱垂示來  
億過者興感

通訓大夫司憲府監察權公墓碣銘

並序  
甲午

權生心彥為其五世祖監察公受狀於李上舍用休



請碣文于余余不文亦不敢辭謹因原狀而序之曰  
公諱履中字子正初諱有中安東人太師諱幸之後  
文正公諱溥十世孫也曾祖諱振興牲署參奉 贈  
戶曹參判祖諱常同知中樞府事 贈領議政東興  
府院君以孝稱考諱愷知中樞府事 贈左贊成妣  
贈貞敬夫人李氏宗室福寧君天麟之女也公以  
萬曆辛巳十二月三日生戊午擢魁科時光海政亂  
科道淆雜至是有輸錢放榜之令公不應命榜亦尋  
以不公未放自是公知世道無可為遂下湖南家于  
金溝縣之黃山自號南崖杜門讀書以自樂癸亥

改王將復試戊午辛酉未放榜諸人公不肯赴人有  
勸之者公曰科舉士子立身初程不可苟也終不撓  
焉聞者益賢之時人高其風誼凡冠蓋之南下者無  
不造謁郡縣治饔餼以待因名其材曰公須云後被  
調 授桃源重林慶安三道察訪 宗廟署直長掌  
苑署別提或一 肅即辭或暫赴旋適及拜司憲府  
監察以微事棄官歸通津墳庵老焉蕭然草屋圖書  
而已公性嚴正動以古人律身清儉自持居家敦孝  
友謹祭祀睦宗族澹於名利不苟祿以為心故見憚  
於世而不究其用識者惜之公卒於庚子六月二十



八日享年八十葬于通津府北柳規洞負乾原夫人南陽洪氏生員字慶女長於公四歲後公一暮卒墓祔公左公有一子二女子大榮婿趙松年郡守金萬亨大榮四子三女子德昌縣監德任生員德成德應婿尹重周尹遇徵韓振松年三子三女子漢叟奉事渭叟府使沂叟縣監婿洪受澆府使李景賢柳命天判府事萬亨二子一女子一振一鳴武科婿申潤銘曰  
從其義不徇乎名守其志不慕乎榮位不滿德天餉遐齡歆知公者請徵斯銘

處士安公墓碣記 甲午

公諱世徵字汝休姓安氏廣州人始祖諱邦傑事麗祖封本州君中世移嶺南遂為嶺人入我朝有司諫諱觀佐郎諱增於公為六世五世曾祖諱大海祖諱瑄司憲府監察考諱著漢配安東權瑩之女公生於崇禎甲申九月二十日及長天姿魁偉性簡重有威儀未嘗以色辭假人隱居讀書教家塾子弟義方甚嚴底于有成卒於戊寅十二月二十四日壽五十五葬于永川郡之入谷獨山甲坐原配達城徐爾科之女墓在同郡菁堤先塋西坐原有一子二女男處



靜塔孫是格孫是采側室子四人道靜和靜有靜思  
靜處靜有五男鼎勳鼎國鼎來鼎寶鼎受道靜無子  
和靜一子鼎業有靜二子鼎崑鼎崙思靜二子鼎泰  
鼎德公之沒已久而墓道無顯刻今其諸孫將治石  
立碣以余有宗人之誼馳書屬之文謹記如右

學生安公墓碣記

甲午

公諱信亨字忠伯廣州人始祖諱邦傑事高麗太祖  
封廣州君中世有諱綏官殿中侍御史始居咸安郡  
遂為嶺人入本朝諱觀事我恭僖王選廉謹歷  
三世至生員諱餘慶號玉川以學行著於公為五代

祖高祖諱濤文科正郎曾祖諱翔漢宣教郎祖諱時  
泰考諱欽妣南平文氏聖觀之女公以朋陵壬申  
七月二十二日生今上三十五年己卯正月十二  
日卒享年六十八葬于密陽星巒村先塋左子坐原  
配耽津俞氏必明之女生後公一歲沒後公八歲享  
年七十五葬于星巒案山瑟伊洞艮坐原有子五人  
長景漸今禮曹佐郎次景晉景愚景濟景履佐郎生  
一男五女男瑋重婚全弘毅郭崇敬黃尚醵朴馨國  
季女未行景晉生二男三女男瑩重婚李守直  
餘幼景愚生一男三女男瑛重婚李衡岳餘幼景濟



生二男瓊重璠重景履生二男二女皆幼男女孫共二十餘人公少善病十五始入學勵志讀書經史子集讀幾千遍抄寫諸書殆至百卷手指胼核嘗歎曰晚學無成天也又能自起為家謀畫經理有成法教諸子各隨其才佐郎君以文學成名餘各以勤儉克家俞夫人克遵公志善內治年踰七十猶躬執織紵佐郎君嘗從學遠近夫人節蓄資辦以供其費及佐郎君釋褐登朝公及夫人不及見矣甲午春余寓京城東村佐郎君宦遊與之同舍一日出示公狀錄謂余曰祿不逮養無以報罔涯之恩而又不能表諸

墓道垂示來裔則不孝尤大矣盍為我文之公與吾先子相得歡甚鼎福自幼從公遊知公事亦莫如我吾兩人今已白首俱抱風樹之痛追想昔日其忍辭諸謹序以記之

學生安公墓碣記 甲午

公諱處靜字叔敬其先廣州人七世祖司諫諱觀號苔巒有清德六世祖佐郎諱增早歲恬退築溪亭于永川郡之疑江上號玩龜以終烏魯祖諱璠司憲府監察祖諱著漢考諱世徵妣達城徐氏爾科之女公以明陵丙辰五月初九日生于道東里歿于今



上辛未十一月二十一日壽七十六葬于又谷先塋  
已坐原公生未一月失恃鞠於庶母蔡及長受業家  
庭得聞義訓戊寅丁艱血指以進哀毀踰節待蔡及  
庶弟四人盡孝友之道李叅判衡祥僑居同郡嘗語  
人曰對安某不覺自斂其見重於先達如此配星山  
李氏得三之女無后葬祔公后配道安李氏柱漢之  
女生五子三女男鼎勳鼎國鼎來鼎寶鼎受女適都  
獻謨呂弘業李鼎梅鼎勳一女適鄭德範取鼎來子  
景稷為後後生二男一女男景元景八女適趙忠慶  
鼎國四子三女男景憲景義景玉景潤女適申壽一

餘未行鼎來二男景嵩景益鼎寶三男三女男景贊  
景文景武女適李鼎樸趙愨然季未行鼎受一男二  
女男景聃女適都必復次未行內外孫曾不能盡記  
甲午秋景嵩受其父兄之命以狀屬余是亦孝子之  
用心也其敢辭諸謹撰次如右

成均進士桐巢南公墓碣銘 並序

桐巢先生南公之墓在公州之葛山女坐原公季子  
奎以家狀來屬鼎福曰先人葬已三十餘年墓碣無  
刻奎之季父潛翁嘗詔奎曰幽堂之文星湖李先生  
已誌之矣當受碣文于執事敢以請鼎福愚陋老洫



聞之瞿然不敢當而潛翁父執也不敢以非其人而辭焉按狀公諱夏正字時伯宜寧人南氏興于麗代入我朝有上相忠景公諱在左相忠簡公諱智勳業德望著國乘四世至諱應雲吏曹叅判號菊窓有文武全才於公為六世祖曾祖諱斗華監察贈左承旨祖諱重維有士林重望大興郡守考諱壽喬成均生員妣晉州姜氏府使碩老之女也以我肅廟戊午八月二十五日生幼有德器郡守公愛而期許之甚少孤力學不倦及長博通經史百家語善屬文華聞大播一時儕流莫之先焉有一文宰讀公出

師策曰是文當令澤堂讓頭澤堂即仁祖朝主文李尚書植號也公雅性恬素不汲汲於進取至甲午始登上庠而見世道益壞四維頽弛尤無意於世丙午遭內艱葬于公州之葛山先塋反歸于振威縣之桐泉舊庄居焉服闋仍號桐巢惟以文酒自娛日夕倘佯不復問漢津者殆三十年至英宗辛未十月初四日卒享年七十四十二月某日葬于先塋公篤於人倫事大夫人盡其孝撫羣弟盡其友居憂時公年幾五十而終喪不脫衰經哀毀踰禮尤謹於奉先之節懋盡誠敬懼先德之泯也備述累世言行燔誌



刻碣俾傳永久接人無貴賤一以誠信教子侄以義方無不孝友敦睦知舊莫不曰公之教使然也晚年手草治命身後事務從儉約又有戒子孫文略曰保子孫之道莫如懋德勸學守家業之道莫如尚儉節用又戒崇財計利利已害人曰如是者菑不逮身則必及後嗣吾見多矣必慎之又曰窮達有命非力可求道義在吾求之無不得又曰御家以四教勤儉恭恕整家以四禮冠婚喪祭此八字符傳百世無改也觀於此可測公之所存也公初配泗川睦氏佐郎昌萬之女生後公一歲丁酉殉育三男一女男長圭夙

有才行蚤歿次壻次壻婿鄭熙百後配安東權氏維之女癸未生丙申歿育一男二女男奎即請碣文者也婿尹恠權尚燻壻無子取從弟赫子允學為后四女適申暉姜涑洪樂謙權堦壻二男允謙允益允謙出后長房奎有三男允鑑允欽二字公既懷抱利器而絕意外慕居閑養性不識世外風波而有所發為文章以見其志所著四代春秋即遊戲之筆而傳奇體也又草謾錄數卷痛黨論之錮人心也不以威恠不以愛護一歸于正知言者曰史家之董狐也噫世教衰而黨議橫士之剗光晦彩不得施者何限而世



獨推桐巢公者蓋其文彩風節有足動人也潛翁諱夏行有文行與公稱金昆王友云兩夫人葬并祔公墓銘曰

先生之道惟貞是保芥視軒冕樂此枯槁先生之文惟道是權華實具備務去陳言既道文之若是君子人乎君子

松窩處士安公墓碣銘

並序  
己亥

松窩處士安公歿既二十餘歲而墓闕顯刻於是門弟懼懿行泯鬱相與伐石樹碣其孤仁復氏受狀於李公象靖東懇鼎福曰我先考與尊先君有針芥之

歡不獨宗誼然也我先墓有事而子忍無一語鼎福感念先契之重雖未及公之門又嘗受訓戒之書書今在篋矣其敢辭諸謹按公諱命夏字國華系出廣州高麗大將軍諱邦傑之後傳至侍御史諱綏始居咸安六世有叅判諱淹慶 端宗朝忠臣監司完慶之兄生禮安縣監諱億壽又徙密陽之薪蒲是公之九世祖曾祖諱弘翼祖諱應斗考諱漢杰并以文學稱妣牙山蔣氏處士熙績之女也公天姿端慤聰藝超等幼受學于塾師塾師歎賞曰他日君子儒也及長聞錦陽李公以古道訓後進贄書請教受四子西



銘玉山講義等書李公亟稱之又與李公之胤密庵  
栽及鄭墳叟萬陽篬叟葵陽金谷川尚鼎往復琢磨  
諸公咸推重焉公性至孝九歲侍王母疾一日病忽  
劇公嚙掌出血注口乃甦十三遭先府君喪哀毀守  
制如成人事母夫人承養無違宅邊有松產菌以供  
甘旨孫進士碩寬作松菌說以美之丙申丁憂泣血  
哀號啜粥過期府使金公始慶聞而賢之致賻以助  
祭公雅有遐想名山勝水筇屐殆遍慕濂堂即公六  
世祖所築世久堂廢公構屋松下扁之曰松窩壁揭  
圖書讀書其中嘯咏自適不知世間紛華之為何物

如公者可謂聖世之逸民而無愧矣 英宗壬申十  
二月晦終于正寢距生 肅宗壬戌四月九日享年  
七十一葬于府東栗洞壬坐原配烏川鄭氏宗陽之  
女文牧使號暘溪好仁之玄孫賢有婦道生後公一  
歲先公十歲而歿與公合葬生三男長仁履為宗兄  
後有三子一女子景龜景駿景豹女適成啓達次仁  
復有二子三女子景珪景珩女適姜允尚曹善餘李  
桓季仁泰有二子一女子景顯景璿女適都必權銘  
曰  
木訥近仁先聖有言朴實用功朱訓炳然公實服膺



至于白首内篤孝弟外謹師友 聖代遺逸士林矜  
式全兩歸之家食亦吉栗洞之原宰如其阡有饒斯  
石垂示來千

自如道察訪 贈通訓大夫司憲府執義鈞隱

韓公墓碣銘

並序  
庚子

韓氏出西原者源遠而族大始太尉蘭起麗初赫世  
簪纓耀映國乘而至麗季有文敬公脩以文章道德  
名入本 朝文簡公尚敬文靖公繼禮俱以勳業著  
公即文靖公五世孫也公諱夢參字子變曾祖諱承  
利見燕山政亂無意榮進卷歸于晉陽自號遯庵晉

之韓始此祖諱汝哲官司成考諱誠生員以文學薦  
授司饗參奉 宗廟奉事皆不赴語詳州誌妣陽川  
許氏縣監鑄之女文貞公琛之曾孫也公以萬曆己  
丑生于州東丁樹村第幼穎秀有異質遭倭亂失學  
甫十歲奉事公授史畧未半卷而文理驟達癸卯丁  
外艱丙午丁內艱與伯氏寧遠公夢龍前後居廬六  
年守制如禮毀瘠幾不保服闋後自傷學業未進慨  
然有求道之志始執贄於朴篁巖齊仁之門先質以  
三百篇之疑義次及諸經難疑答問洞見突奧進揖  
退揚動中矩履朴先生吃吃稱不已寒岡鄭先生亦



順奇集 卷二十一  
器重之導以為學之方晚又質業于張旅軒先生同  
門推重焉中癸丑生員丙辰丁巳間光海將廢母后  
公憂憤歆封章西上伯氏泣挽而止仍廢舉業守志  
丘樊丙子虜變鄉人推公為義兵將兵未發而和已  
成矣遂停行无無當世之意聞咸安院北有水石之  
勝構亭于其地題庭畔巖曰石亭公素善八法外人  
愛其筆刻而傳之尋移適巖漁釣而樂之因號適巖  
釣隱杜門讀書清坐終日耆叟許先生一見契合書  
贈堆案有晚年清福使人健羨之語己卯 除自如  
道察訪赴任三月棄歸賦詩曰梅外踈篁戴雪寒折

腰如學老郵官雖然勁節終無改莫作風塵潦倒看  
可想其志趣之有存也戊戌又移陽村亦有溪山之  
勝己亥薦 除童蒙教官不赴壬寅十一月二十五  
日易簣于丁樹村之舊第享年七十四翌年正月葬  
于宅東沙寧洞丙戌移窆于河東府興龍之乙坐原  
有集二卷藏于家 肅廟壬午士林享于臨川祠  
英廟己酉以曾孫範錫貴 贈司憲府執義公早遊  
諸先生之門劬心經傳日誦心經近思錄而驗之於  
身性簡默端莊未嘗見惰容至若女樂譚語不肯留  
之視聽尤篤於內行事親孝事兄謹祭祀必齋沐致



誠雖值癘疫享祀無闕教子弟必謹言動居鄉無貴  
賤待以和敬喜施與賙窮急困如不及烏聞人喪食  
必舍肉客至雖夜衣帶必飭平居罕交遊以是聲聞  
未振然其所與遊者皆當世文行之士而趙澗松任  
道河謙齋弘道及許先生穆尤其較著者也方仁弘  
之用權也江右人士波奔同郡成好正邀公往見公  
正色折之曰其人也學術詆斥退陶當國主張廢論  
實斯文之亂賊 國家之凶逆吾嘗欲觀伽倻之勝  
而以其近此人之居故不欲踐其土况與之見乎趙  
澗松詩獻可卞奸先見早者是也每讀書至古人節

義處必淹泣而歎吉冶隱南秋江趙大笑軒遺事莫  
不著文闡揚以寓尊慕之誠嘗於宜寧欲建秋江祠  
士論携貳竟不成以為終身之恨以士林之願常為  
德川新山等諸院山長講學養士之規皆有成法云  
配昌寧張氏叅奉益祺之女賢有婦德生三男二女  
男長時晦次時憲出後伯氏次時龜生員女長適趙  
徵遠生負次適朴尚圭時晦二子翼世武府使榮世  
武虞侯二婿成摺武科尹世奎時憲一子弼世武主  
簿二婿河洞權井享時龜二子泰世武科景世二婿  
權萬亨慎光翼翼世一子命錫榮世二子範錫兵使



箕錫弼世三子宗錫宇錫武虞侯寅錫泰世一子鼎錫景世一子永錫內外孫今至五世六世多不錄先生歿已久而流風漸遠子孫懼其湮沒無傳也求文於鼎福撰德大事也豈可人人而為之乎固辭不得謹依張正卽錄狀序次如右為之銘曰

稟於天者質之純也得於師者學之真也窮達之際君子任分退修初服芥視軒冕適巖烟霞高風繇邈瞻彼興龍吉士攸宅

通訓大夫行司憲府監察安公墓碣銘

並序

後死之悲甚於逝者蓋逝者之有知無知不可知而

生者有知則其悲也豈不甚哉余與可中殷老同庚同宗而志又同靈犀一點千里而合席矣今者殷老逝而余與可中存焉是可悲也而今日之殷老明日之余與可中畢竟同歸抑又何悲可中搆殷老狀走書索碣文余雖不文豈忍固辭以負平生之好哉公諱景說殷老其字也幼穎秀七歲始讀書善記誦能綴文稍長與從兄景時可中質業于鄉先生墳篋叟兩鄭公之門而公亟稱之及冠累失鄉解遂治經業以精通名然數奇至丙子秋始登第選入槐院癸未權知副正字丙戌陞正字著作兼奉常直長丁亥陞



博士尋陞叅拜成均典籍戊子遷司憲府監察己丑有怪鬼輦上䟽忤旨上疑嶺論之同然也盡罷嶺人之在朝者公遂罷歸此其從政大畧也公生于肅廟壬辰十一月二十一日卒于己亥十一月初六日享年六十有八明年二月葬于郡之菁堤先塋亥坐原公系出廣州中世移咸安八世又徙密陽有諱觀號苔巒官司諫以清白著生諱增文科佐郎搆亭于永川之道東村號玩龜自是遂為永人於公為八世祖曾祖諱世英祖諱后靜有厚德登第忤時論官止成均學正考諱汝基妣八莒都氏處士萬甲之女

公娶務安朴勛相之女生二男三女男長致重進士有文藝先公歿次達重李龜東朴來禎孫啓東其婿也致重一子孝大三女長適柳光沂餘幼達重一子孝能李龜東一子夢淳一女適柳起文朴來禎一子豹得孫啓東二子周穆壽穆公篤於內行事父母色養無違家貧親老力穡以供給牛下賤役亦不憚勞有一弟友愛亦至門庭之內怡怡如也丁巳遭內憂壬申丁外艱前後居喪戚易中禮祭必齋沐思其所嗜而致享焉著存之誠至老不衰其旅宦在泮若值親忌終日愀然靜坐晨設玄酒焚香拜伏以達曙泮



人至今稱誦云平居早起誦心經贊及諸銘箴盥洗拜家廟日以為常事庶母盡其誠與同堂兄弟折甘分少源源湛樂巷內宗族甚多敬老慈幼咸中儀則有窮乏者不問有無必傾儲而資之接人之際無貴賤賢否輸其誠款咸得歡心口絕臧否心無伎求至於僕妾之賤未嘗加以惡言是以人皆以忠厚長者目之蓋其淳謹寬和之性稟之雖天而若無平日持養之工能如是乎公少遊長者之門習聞君子之行公雖不以學自處而未必非學之力也公居常以名節自勵見人之浮沉世路陰陽其心者必嘖蹙而痛

絕之嘗於釋褐榮歸之日有宗人之主時論而為中表親者時宰昌寧迎接款昵意欲鉤致之公正色折之其人憮然而止其宦遊在泮也足不出泮村外未嘗識一權貴其介特自重有如是者已丑罷官可謂橫逆而公無幾微色歸卧先寧日以文史碁酒自娛十年家食一不檢擬人或慰其沉屈則曰窠窄員多勢固然矣我之得此足矣何望其他泊然無求於世優游任命以終與其斃斃風塵希覬於不可必得之事者其清福果何如哉銘曰  
君子之道貴乎誠慤有美安公坦無裏褻孝反之性



本于天植愷悌之行著于鄉曲服訓賢師實藉學力  
晚歲登朝宦道墻埴鴻罹遘斥十載家食霜臺冷  
啣如鳥過隙趾美玩龜心存介石人稱其屈公云自  
足視彼奔騫天淵永隔我銘公碣庶其無忤

不憂軒鄭公墓碣銘

並序 甲辰

公諱相點字仲與首陽人高麗侍中肅之後入我  
朝有左贊成貞度公易遂大顯公其十一世孫也四  
世至進士希儉與伯氏虛菴先生希良同學值喬桐  
主政亂虛菴遜世公亦廢舉詩酒自娛號桂陽漁隱  
世高其節又三世至諱文孚號農圃有文武全才

宣廟壬辰以北評事倡義起兵誅土賊逐倭寇事在  
國乘官至兵曹叅判 仁祖甲子坐詩案被禍後雖  
伸理 贈貳相謚忠毅而人至今悲之於公為高祖  
曾祖諱大隆 贈左承旨性至孝自罹家禍抱痛含  
恤與伯氏進士公某南奔晉陽不與世相通問子孫  
因居焉祖諱有禔考諱構號露頂軒有志槩尚文詞  
性高簡喜施與三世皆隱德不出遵先志也妣清州  
韓氏通德郎碩運女縣監時重孫也賢有婦德以  
明陵癸酉十一月十七日生公於州東龍巖里第公  
幼聰敏甫齠齠作句多驚人語十一歲冬至有詩曰



斗柄初回壬癸間天陽一氣地中生露頂公竒之曰  
兒當為窮理之儒人謂必能再立鄭氏十二通經史  
尋嬰竒疾幾十年後疾稍平因謝公車惟以讀書願  
養為務視世之名利紛華泊如也性孝友養志無違  
喪祭如禮有妹遠適不忍久離源源省視到老不替  
撫愛庶弟如敵己以禮範家閨門肅穆子孫衆多教  
以義方不少假以色辭皆能遵承不愆鄉黨視為準  
則待人之際寬弘坦易洞見心腑款接賓友無不得  
其歡心黨論橫流各執偏見而公皆折衷義理不以  
私好惡低仰未嘗言人過失以是人皆愛而敬之賙

恤窮困恩義兼至或畜養或指導而成就之者非一  
二數公養疾居閑非甚病書未嘗一日去手援據古  
今出入經史與人語疊疊不休雖不從事於功令之  
文而博覽多積葢為詩文詞理精到嘗為吳學士瑗  
所稱賞吳即公戚屬之親切者也公持身嚴整幼讀  
程子責周恭叔禽獸不若之語而終身佩服無房外  
之色脩飭如處子烏其清高絕俗之操寬和慈良之  
心雖天稟使然而率皆得之於讀書體行中出來制  
行之高非當世所稱學者之所能髣髴也迨疾革子  
孫環侍涕泣公止之曰無以為也我生癸酉知有今



日死生常理不足為悲了無怛化之意考終於正寢  
即丁亥四月七日也享年七十五訃聞遠近嗟惜曰  
南州高士亡矣鞠窆之日數郡畢至用其年七月某  
甲葬于靈鳳山之卯坐原公取易樂天知命之義名  
其軒曰不憂有遺稿二卷又有詩誦二篇記古今詩  
律而間施評騭皆誦憶而成者也配安東權氏通德  
郎壽昌女文牧使字亨孫賢淑和婉入門無違德仁  
惠之澤及於鄰里至今稱誦公家素饒中歲剝落夫  
人勤苦拮据綜理微密使公無內顧之憂而公亦未  
嘗問有無費人謂公之賢夫人亦與有助焉生于甲

戌十二月二十八日卒于丙子正月二十七日初權  
厝于靈鳳山乙坐丙申二月以宅兆不吉遷窆于州  
西馬洞庚坐原生七男二女男長壇早歿有一子鉉  
毅次男埴有文行公歿後過毀致疾纔服闋而歿有  
四子鎮毅鐸毅鋼毅鑽毅一女婿朴之源次壩有三  
子銘毅鉉毅錕毅一女婿權懋中庶出二子一女次  
瑾出后叔父相臨取兄子鐸毅為嗣一女未笄庶子  
女各二次埴有二子鑑毅一幼二女婿權燦河錫圭  
次壩取兄子錕毅為嗣次真有三子一女并幼長婿  
朴仁赫二子四女次壩姜稗一子三女內外曾玄八



十餘人天之報施其在斯乎遂為之銘曰

首陽玄胄世烜赫跨歷兩代簪纓續忠毅罹讒久未  
暴三世含恤飄南服公趾其美韞于櫝劬書禋躬聊  
自樂自天申佑餉壽福有子七人慶遠毓靈鳳宅兆  
垂千億

成均進士浮查成公墓碣銘

並序  
乙巳

南冥曹先生唱道於東南豪傑之士多出其門公其  
一也公諱汝信字公實姓成氏其先昌寧人遠祖松  
國漢弼仕高麗位宰相赫世簪紱八世至長興庫副  
使祐始居晉州於公為高祖校理諱安重 贈戶叅

諱日休叅奉 贈右尹諱斗年其三世也俱以文學  
孝行稱妣草溪卞氏忠順衛元宗女以嘉靖丙午生  
公于州之代如村生而岐嶷儀容秀整叅判公曰此  
兒必大吾門稍長力學十四通經書外傳程文各體  
無不能人稱神童受業于南冥龜巖二先生之門二  
先生皆器重之得聞敬義孝悌忠信之說終身佩服  
自治教人必以此為本嘗做業于斷俗寺有僧休靜  
者撰三家龜鑑以儒家置之末而刊行又造佛像稱  
四天王形甚怪偉公忿其書之不倫命僧徒焚其板  
毀佛像南冥先生聞之曰後生輩務為調適未見其



進就夫子之取狂簡者此也時公年二十三是歲丁外艱哀毀過禮廬墓三年惟食羊屑粥號哭不絕聲服纜闋又丁內艱執制一如前喪鄉里感歎右尹公臨歿語以不廢舉業公克遵先志至老不懈前後發解二十四已酉始中生進兩試因見世道昏亂遂決長往之計所居有江山之勝嘗築浮查亭自號浮查野老與同志為鷄黍約輪訪觴咏或蠟屐登山或扁舟泛江以為樂烏龍蛇亂後風俗偷薄士不知學公慨然就所居里琴山做呂氏鄉約退溪洞約而行之立養蒙志學二齋聚鄉子弟教之又復南真所定婚

喪之禮於是而文風丕振禮教興行公絕志外慕優遊養閑數十餘年以壽 朝廷授通政資崇禎壬申十一月朔卒壽八十七易簣前日有微感翌朝溼洗謁廟如平日退坐正寢集子孫各有教命正席就寢而逝人皆異之明年正月葬于紺巖山午向從治命也公風儀秀偉宇量深弘平生無疾言遽色門庭之內怒罵不行而闡政自肅篤於人倫事父母殫其孝事伯仲盡其敬尤謹祭祀七戒三齋一遵禮則滌器具饌躬自為之嘗戒諸子曰祭以誠潔為主不在豐薄苟不誠潔神必不享日必冠帶謁家廟退書室拱



手危坐終日看書寂若無人公之詩文豪健有理致筆法適勁尤邃於性理之義而務自韜晦未嘗夸衒于人其所交遊盡一時之名勝而金蘭之契終始不渝見其有非理遭患者痛若在己金義將德齡之被誣崔守愚求慶之寃死鄭桐溪蘊之得罪皆抗章伸理或得或不得而其勇於為義如此接人之際圭角不露而嚴於賢邪之分仁弘之孫稜及李偉卿邀公諸子同遊公曰士不可與權門子弟遊且觀稜也貌恭而心狠非吉人也諸子不敢往後聞凶謀定於是日云人服其明見仁弘即公同門也晉陝地近而不

為其所染汚則其清操氣節益可見也素有經濟之志嘗以稷契自比觀古人明良相遇必掩卷感歎雖處畎畝而傷時憂國之念未嘗已也公之高才邃學出可以有為而中值廢君亂政及其日月重明而公又老矣遂使幼學壯行之志竟無所成而殉身入地豈不惜哉公有遺集三卷又撰晉陽誌後士林追慕享于臨川祠配密陽朴氏萬戶士信女先公六年卒葬州北松谷生五男二女長鑄進士有子瀚求澣求洛求濟求次鏞有子洙求泗求汶求次鏞有子澗求灝求次鏞有子源求治求進士次銳有子沂求澧



永滿永婚李玘崔潔同知公耳孫東益師濂馳書屬  
鼎福請狀又請碣文鼎福既撰其狀故不敢辭而謹  
序如右銘曰

於乎先生 聖世逸民早得賢師耽樂道真學本乎  
心敬義夾進行著于身孝悌忠信化行鄉里教洽青  
衿長材偉器迹屈山林時耶命耶民無祿耶刻銘詔  
後紺岳之麓

禁府都事韓公墓碣銘

並序  
丙午

余友韓君竣袖其先祖都事公遺事示之曰先祖節  
行禮宜祭社而竟不果又無傳後之文何以詔後昆

耶撰德大事也余以非其人辭不得按公諱復胤字  
元吉號斗亭晚稱睡庵西原人襄節公確章悼公致  
義郡守倬縣令守溫司諫顯其五世也妣溫陽鄭珣  
女公以萬曆甲戌生出後伯父縣監顯所後妣驪興  
李氏佐郎 贈領相士彥女也公性清介能文孽臣  
纘男為同堂兄弟纘主凶論欲鉤結公不得癸丑廢  
論起太學生將投凶疏欲藉公為重劫公泮主人使  
公來叅泮嫗日來號泣請去公曉以義理嫗收淚而  
對曰早知若此豈敢煩公耶公與鄭復亨李安真權  
滄李得養等抗疏被嚴批公知禍機將發遂歸居黃



川書集卷二十一  
驪塋下脫畧世事著書自娛癸丑 反正後授 靖  
陵叅奉金吾郎皆肅 命而歸若將終身 顯廟庚  
午卒壽八十七築府西興谷面南山艮坐原配縣監  
章溪鄭煥女有二男琇叅奉珽六女適趙惟珩李挺  
立李浚金世灝李郇南天斗琇子汝說孫格具以文  
行名公尤深於性理著述甚富佚於回祿有遺稿一  
卷藏于家嘗誡子弟曰雜技蠱人心術外來之財非  
吾物也未嘗以一毫干人人稱清節君子銘曰  
玉之潔兮無瑕金之鍊兮愈剛早守東岡之志終葬  
南山之陽

處士節初趙公墓碣銘

並序  
己酉

楊根濱陽里有君子曰趙公恒錫字季常與伯氏諱  
觀錫力學有至行人謂金昆玉友公晚歲悲致養之  
無所痛伯氏之寃死廢舉長往自號節初其繇不出  
戶庭其義則在為學為含章在處事為括囊在言語  
為簡嘿在立身為隱遜觀於此可以知公之志尚矣  
以其見於行事者言之公與伯氏逐日晨謁祠堂孝  
卷二親愛敬俱至讀書之暇常在親側愉色婉容務  
悅親心丙午丁外艱居喪之節令人感歎奉母夫人  
盡其誠家雖貧而甘旨不乏享年七十九疾革禱天



川書集卷二十一  
血指竟不救哀毀踰節及葬廬墓三年事伯氏如事  
父母事無自專惟伯氏言是從議或不合必和顏柔  
辭以解之伯氏亦樂從之 英宗戊辰投書之變伯  
氏橫罹瘦死狂狴公日夜號哭如不欲生期年不脫  
經帶躬親饋奠有詩曰無之有斯命矣夫從古冤枉  
似公無弟男不及淳于女地下何顏拜見乎後 上  
覺其冤伸理有恤典公感激 聖恩而孔懷情深無  
意於世歸楸下惟以讀書為樂尤喜易公之先漢陽  
人我 端宗朝戶曹叅判安孝被家禍避居濱陽里  
終而窆于里南道箴洞遂世葬焉於公為八世祖高

祖諱弘璧 宣廟壬亂白衣扈從末乃辭勳 上嘉  
之特命推 恩父母以獎之後以薦官朔寧郡守諱  
有信承訓即諱胤漢通德郎諱汝瑗即公三世也并  
不仕皆以文學名妣丹陽李弘斗女公前配密陽朴  
尚益女有一男一女男泰文出后伯父女適柳顯喆  
繼配清州韓沃女有一男泰巖墓在公墓坤方數百  
步乙坐二夫人俱以婦德稱泰文無育泰巖三男一  
女男驥林德林奎林女適李承翼公長不逾中人而  
天質粹美簡嘿端嚴一切紛華泊如也經史之餘旁  
治舉業駢儷為儕友推許試場有以標題示之者公



斥之曰國試循私與受皆不義也人皆難之其接人  
恭謙和易揚人之善而不言其過急人之困而惟恐  
不及人皆欣慕焉朴上舍長漢曰天品甚高行已有  
方金上舍鑛曰今世之董印南金斯文源嵩曰謙謙  
自牧闇然日章之君子三人者士林之望而習於公  
者也噫天道福善善行如公而竟窮沒於巖穴食報  
之理其在後嗣歟銘曰

幽谷蘭有誰看荆山璞無人琢蘊輝光徒自香雖不  
周何怨尤

處士李公墓碣銘

並序  
庚戌

雖有高世之學絕人之行無後賢之表章子孫之褒  
揚則名湮沒而無稱者千古何限苞山李君宜震八  
代祖處士公有德行鄭寒岡趙澗松皆有所錄李君  
據以為狀使從弟益震北走八百里執贄而來屬鼎  
福曰吾先祖志行如此而畢如之丘尚闕數尺之表  
願執事之文之也鼎福瞿然曰鼎福老耄無文竊恐  
犯蚩冷符之譏而反有累於公不足以辱命李君留  
累日力懇不得已遂拜受而讀之公諱珣字可沽其  
先慶州人後至諱禹備封載寧君遂移貫為載寧人  
歷羅麗二代簪紱相傳曾祖諱午進士 贈兵議郎



麗末直臣申之弟也見麗運將訖與洪直學載趙典  
書悅時會三嘉之雲衢亭悲歌哀詠有麥秀採薇之  
思自密城移咸陽之茅谷終身不出祖諱介智 贈  
吏叅長子孟賢文壯元官觀察使次仲賢官副學季  
季賢生員官司議即公之考也妣李氏府使孟枝之  
女也公以弘治壬戌生于咸之山翼洞年九歲荐罹  
兩艱而司議公以非命殞于獄公痛慕哀毀守制如  
成人稍長豪邁有氣槩業武工射御旋自悔悟曰痛  
深王裒功名何為遂盡棄弓馬折節為學築室於松  
楸下終日讀書不以事物經心惟以訓誨後進為已

任賴以成名者多恒以生不致養為憾祭祀殫竭誠  
敬宿戒齋沐灑掃庭室執爨婢僕皆令沐浴將事薦  
獻如生前膝下勸侑之狀寧遲勿速愛慈兼至雖隆  
冬盛寒必汗沾拜席澗松三綱絕句咏公詩曰痛親  
非命抱哀傷閉戶終身不踐鄉追養每思如在敬視  
公心事可沾裳蓋寶錄也宗家祠廟在數十里外每  
月朔望致齋叅謁不避風雨自少至老未嘗少懈居  
家謹嚴有法度門庭之內無敢有喧譁者平生足迹  
不及城市鄉人罕見其面或不獲已入城必於門外  
下馬或地主存問必冠服設席待來使甚敬人或笑



其過恭而不少撓處心行事一出悃愾無毫髮矯飾  
意與人言未嘗言利聞人善行雖與子弟共說必危  
坐拱手而致敬烏州郡屢以行義論薦而竟不報識  
者恨之萬曆己卯終于正寢享年七十八葬郡西大  
山乙坐原公以名家華族抱負不少而至痛在心卷  
懷隱遁不過為鄉里獨善篤行之士而止惜哉配清  
州韓氏徵士承利之女西平君繼禮之曾孫生四男  
繼配黃氏無后二配墓俱在晉州治東沙寧洞丑坐  
男長喜精次喜中俱生負次喜時三房并無后次喜  
仁生二男承勳繼勳皆無后承勳系子塤 贈戶佐

又無子系子邦鉉 贈監察生三男三女男長晚馨  
二子道明德明次晚秘一子文明次晚釅一子學明  
今至八世九世孫若干人噫今距公之世幾三百  
載而子孫零替孤寡傳家文獻蕩佚無徵潛德幽光  
人鮮知之如非二先生之著述李君追遠之誠何以  
考信於將來哉銘曰  
谷蘭無採徒自香荆玉始現發輝光不有賢孫孰闡  
揚過者必式賢士歲

資憲大夫議政府左叅贊兼春秋館事月潭尹

公墓碣銘

並序  
辛亥



公初諱義立字止中後有避改義為毅坡平人麗祖功臣莘達之後聯世烜赫至于我朝曾祖縣監

贈吏曹叅判諱廷霖祖縣令贈吏曹判書諱希廉

宣廟潛邸師傅考工曹判書諱國馨以德業才望名妣經歷平壤趙琇女隆慶戊辰八月己卯生公幼而秀美俊偉六歲入學悟解絕異萬曆甲午文科由槐院入翰苑自後歷踐春坊玉署兩司丙申以弘文正字於召對陳戰服臨筵之非上賜華使屏風書以獎之辛丑上遣中使閱兵于三南湖南伯李弘老賂遺多公以副應教言宦官干預軍政之失

方伯媚悅中官之罪時論多之乙巳以校正廳郎陞通政戊申入銀臺丁巳陞嘉善癸亥以右尹僉毛帥文龍毛帥以青布貿餉勒賣之西民大困公平其直毛帥內憾搆陷公不已孽侄仁發以适黨誅公法當連坐馳章待罪李完平張玉城皆上劄陳辨釋不問公自此屢為媚嫉者執言之端而蹤跡羈危矣丁丑陞資憲拜工曹判書至左叅贊辛巳以禮曹判書被劾罷職盖公晚來以眼疾暈倒之症有除必辭時六卿送質于瀋人多圖免言者託此劾公請置削黜之典上素信公只罷職後叙拜知中樞府事癸未



川者魚 卷二十一 三十一  
九月二十九日卒壽七十六公識量宏遠清慎簡素  
事君忠蓋不欺事親承歡養志喪祭致哀敬友兄弟  
睦宗族周窮濟急如不及才周政術八曲州府三按  
藩臬游刃恢恢民皆愛戴去輒豎石頌德平居恂恂  
與物無忤不事作業不近聲色不喜徵逐惟以書史  
自娛自少人許以廊廟之器而竟不大施識者惜之  
所著內外世譜三卷編近代名人言行為挹薰錄二  
卷及野言通載十卷輯甲子後疏劄為懷 恩錄雖  
跡縻塵網而意存遐想著山家清事二卷凡所論撰  
悉闕世教湖洲蔡公曰風姿秀羨氣度閑雅知其為

大君子儀範東溟金公曰清名雅望為時推許考之  
內外而無類當時之月朝如是則公之賢益可知矣  
前夫人軍器寺正竹山朴文榮女一男仁迪早夭四  
女適牧使黃漣郡守安鋌侍直朴以章縣監李孝承  
後夫人牧使草溪鄭燾女三男世獻郡守世晏世翊  
一女適監司吳挺垣世獻四男以乾以復郡守以泰  
為世晏后以豐縣監四女適金洪命金益夏鄭度弘  
趙遠明府使世翊三女適金浩李台龍曹廷亮黃漣  
二子床大諫榮五女尹濬慶趙相漢進士朴千榮掌  
令沈瑞肩都事朴信圭判書安鋌三子壽星五星弼



川者集卷二十一  
星一女辛益慶朴以章二子之顯之碩李孝承二子  
東星府使東垣三女申濡叅判崔泰齊南斗徵吳挺  
垣四子始壽右相始大監司始亨判官始緒判官四  
女閔弘道正卽韓器明金鳳至府使黃鍾亮內外曾  
玄孫若干人鼎福自幼慣聞公為一代名臣而恨不  
詳其言行事實今公五世孫弼咸來請碣銘鼎福老  
洵無文不敢當謹依湖洲誌觀海碑及年譜畧序如  
右銘曰  
德厚而才全大夫之賢志謙而行清君子之貞

先祖高麗奉順大夫判典農寺事府君碑陰記

壬辰

公諱器姓安氏廣州人始祖諱邦傑佐麗祖有功封  
廣州君仍貫烏傳至侍御史諱綏娶咸安喪氏移居  
咸安郡今郡安仁村有觀察井司諫亭皆安氏舊蹟  
也生諱祉光祿大夫判軍器寺事上護軍生諱壽匡  
靖大夫都評議司事生諱海奉善大夫寢園署令贈  
密直副使寔公之皇考公恭愍一作忠宣朝登第官至奉  
順大夫判典農寺事恭讓初托疾退老卒享年八十  
五葬于郡北大山里松川姜石山亥坐原凡三娶初  
配青松沈氏生國柱中郎將閣門祇候中配密陽朴



順菴集卷二十一  
氏生省左叅贊 贈謚思簡後配江陽李氏生夢得  
生負配墓俱未詳而公墓左一弓許良坐原有大墓  
世傳為沈氏墓云嗚呼今距公之世四百年餘言行  
莫徵而後孫聞人若佐郎峴司諫彭命副提學潤孫  
戶曹判書潤德縣令義司諫觀判官景祐司書增承  
旨士雄觀察使容廣陽君滉司饗正大進叅判應亨  
弼善時賢觀察使獻徵承旨後說或以清節或以事  
業文章名都事宅僉正敏學生員餘慶以儒學稱其  
餘以名宦顯者相望而雲仍之散居中外至于十五  
六世而緜且蕃豈非公積善餘蔭耶舊有碣歲久剝

滅不辨字後孫命普福新等伐石改豎屬鼎福文之  
辭不獲謹稽家牒書諸陰面垂示後裔時麗亡後三  
百八十一年壬辰十二月日十三世孫翊衛司翊贊  
鼎福謹記

高麗神虎衛中郎將兼閣門祇候安公碣陰記  
壬辰

公諱國柱姓安氏其先廣州人高麗大將軍諱邦傑  
之後中世有諱綏殿中侍御史娶裴氏始居咸安郡  
今安仁村遺址尚在於公為五世祖光祿大夫判軍  
器寺事上護軍諱祉匡正大夫都評議司事諱壽奉



善大夫寢園署令贈密直副使諱海奉順大夫判典  
 農寺事諱器即其四世也判事公娶按廉使青松沈  
 海之女生公公恭愍朝登第官至中郎將閤門祇候  
 國亡不仕公之長男高麗生員我 太宗以察訪徵  
 不起及卒曹領相錫文輓詩曰雨中蓑笠騎牛客曾  
 向金門待詔歸栗里田中鋤晉草首陽山上採殷薇  
 弟兄湛樂如君少父子貞忠似子稀內賜青袍時把  
 泣至今遺淚未全晞公之出處大節世代綿邈雖不  
 能詳而三復父子貞忠之語可見其困僕之節矣公  
 生四男五女男長岡即生員次巘無后次峴佐郎次

齊女適少監楊澤監務許桓部令洪閭俞佐明石汝  
 剛公之玄孫司諫觀遊佔畢門在朝有清名而子佐  
 郎增友善南冥葩乙巳禍七代孫玉川餘慶與寒岡  
 交以道義聞而都事疇不染北黨以節行名介石貞  
 操奕世相傳蓋公之餘韻使然矣於乎盛哉刊刻時  
石汝剛

下文改之云生員之後有司成淑善侍直淑良司諫  
 觀進士礫司書增生員守淵參奉宗慶生員餘慶副  
 正現正即疇監察璵生員時進時退學正后靜佐郎  
 之後有生員汝居教官仁縣令義參奉世機僉正應  
 虎齊之後有進士孝仁直長孝義赫  
 世簪組于今不絕吁振振乎其盛矣墓在馬輪里明  
 達田負坎原久闕顯刻遠孫命普福新等立石以表  
 時則洪武壬申後三百八十一年壬辰歲十一月日



也旁裔孫翊衛司翊贊鼎福謹記

吏曹叅議磨齋鄭公墓碣陰記 癸巳

皇明嘉靖癸未故吏曹叅議磨齋鄭公卒慕齋金先生銘其碣歲久毀折今 上癸巳後孫某等復治石立之上距始立乙酉二百四十九年公之平生大畧碣銘盡之矣今撫其遺者言之公釋褐入翰苑上疏請治柳子光誣亂史筆之罪與金先生道義交密己卯禍作被斥金先生撰碣時黨禁未解故辭隱而不彰即朱子銘魏元履之意也公靜嘿自守卒為元佑完人而世礪名節公玄孫若叅奉牧使寺正副學諸

公皆著節昏朝龜川君鄭上舍又公家之壻也同時抗義時有一代名節盡歸鄭門之語莫非公遺韻攸暨也誰謂醴泉無源芝草無根乎哉今錄其子孫而詳止玄孫餘只著其登仕者公子別提守厚孫僉正麟壽曾孫思敏思敬文正思慎思謹思誠思賢婿府使沈信謙金鏡清主簿鄭允偉龜川君晬直長趙鐸玄孫思敏子叅奉弘輔思敬子文牧使弘佐監察弘佑文寺正弘任婿進士鄭澤雷思慎子副學弘翼婿文正俞學曾思謹子郡守弘亮思賢子弘績其後有弘任子別提有錫弘翼子判官公夔弘佐孫副奉事



川番集卷二十一  
益相公夔孫叅奉道明弘輔玄孫武虞侯泰久有錫  
曾孫今獻納彥郁今文執義彥暹叅判彥忠其後裔  
子孫遠者至十世十一世

墓表

處士安公墓表

壬辰

公諱汝國字子輔其先廣州人始祖諱邦傑佐麗祖  
封廣州君至諱綏官侍御史始居嶺南之咸安郡後  
移密陽有諱觀司諫號蒼巖諱增正郎號翫龜亭於  
公為七八世祖正郎公後移永川遂為永人諱鳴漢  
判決事諱世英諱石靜官學正即公曾祖考三世而

妣某貫某氏公生于我 明陵乙亥六月二十三日

下有錢文

諸兄友愛篤至性質素無表襮泊然無累於物

視世之梃蠟者若浼己焉古人曰一鄉之善士必有  
貴於一鄉一國之善士必有貴於一國公有德無命  
不能為一國之善士為一鄉之善士而止有識咸悼  
歎焉配達城徐氏學生至海之女生於丙子三月初  
四日沒于乙亥十月十九日與公同兆承順夫子惠  
恤宗黨以婦德稱公無子有一女取第五兄汝器子  
景郁為后娶烏川鄭重簾女女適驪州李憲烈景郁  
二男三女男恒重衡重女適成彥霖朴漢真季幼未



幼行憲烈生五男四女男鼎任鼎新女適鄭光德餘并

順菴先生文集卷之二十一



